



Anders Olsen
Inatsisartuni ilaasortaq, Siumut
/Maani

**Namminersorlutik Oqartussat aammalu kommunit suliffeqarfiisa uuliamik
kiassarnermut atuinerat pillugu § 37 naapertorlugu apeqqummut akissut**

29. apr 2011
Sagsnr. 2011-048722
Dok. Nr. 618298

Asasara Anders Olsen

Postboks 909
3900 Nuuk
Tlf. (+299) 34 50 00
Fax (+299) 34 54 10
E-mail: iaan@nanoq.gl
www.nanoq.gl

Qujanaq uku pillugit apeqqutinnut:

**1. Namminersorlutik Oqartussat kiisalu kommunit suliffeqarfiini tamani illut
atorneqartut kiassarneqarnerinut atatillugu ikummatissaq aningaasanngorlugu
ukiumut atorneqartartoq qanoq annertutigiva?**

Aktiaatileqatigiiffiit Namminersorlutik Oqartussanit pigineqartut kiisalu kommunit suliffeqarfiisa uuliamik kiassarneqarnerinut atatillugu, qanoq annertutigisunik aningaasartuuteqartarnermut paasissutissat Namminersorlutik Oqartussat katersortanngikkaat paasissutissiissutigissavara. Ajoraluartumillu § 37 naapertorlugu apeqqutinut killiliussap iluani Naalakkersuisut paasissutissanik taakkunanga katersinissamut periarfissaqanngillat.

Namminersorlutik Oqartussat gassinik silaannarmut kissakkiartortitsisartunik aniatitsineq pillugu Nalagaaffiit Peqatigiiffiannut nalunaaruteqartarnerannut atatillugu Kalaallit Nunaanni Naatsorsueqqissaartarfik uuliamik eqqussuineq tassanngalu atuineq pillugit paasissutissanik katersisarpoq. Taamaammat Kalaallit Nunaanni uuliamik atuineq ataatsimut isigalugu erseqqinnerusumik paasissutissat pillugit, Kalaallit Nunaanni Naatsorsueqqissaartarfiup nukissiamik atuineq pillugu paasissutissiissutai innersuussutigerusuppakka.

**2. CO₂-mik aniatitsinerup annikillisarnissaa pillugu anguniagaq
piviusunngortissinnaajumallugu apeqqummi pineqartut pillugit Naalakkersuisut
qanoq iliuseqarnialersarpat?**

Gassinik silaannarmik kissakkiartortitsisartunik annikillisaanermut peqataanissamut suliniutit arlallit aallartisarneqarput.

Siullertut Namminersorlutik Oqartussat ukiuni qulikkaani marlussunni uuliamik atuineranut taarsiullugu erngup nukinganik annertusaanermut aningaasaliissuteqartarsimapput. Agguaqatigiissillugu inuiaqatigiit nalilinnik pilersittagaasa 1 %-iat atorneqartarsimavoq, ullumikkullu Nukissiorfiit nukissamik pilersittagaata 60 %-ia ataavartumik nukissiatut pilersinneqartarnera tamatuma kinguneraa. 2013-imilu Ilulissani erngup nukinganik nukissiorfik atorneqalerpat kisitsit taanna 70 %-imut qaffassaaq.

Tamatuma saniatigut qitiusunik kiassaateqarfiit kiisalu nukissiorfinnit uuliamik ingerlateqartunit kiammik atorluaanerup aammalu eqqakkanik ikuallaaviit kiisalu erngup nukinganik pilersitamit sinneqartoorutip kiassarnermi atorluarneqarnerisa annertusitinneqarnissaat sulissutigineqarpoq. Taamaammat illoqarfinni kiassarnerup erngup nukinganeersup annertusaavigineqarnissaa eqqummaariffigineqarpoq.

Ataavartumik nukissat ilisimatusarfigineqarnerinut ineriartortinneqarnerinullu tapiissutinik aaqjissuussinerit Naalakkersuisunit ingerlatiinneqarput. Suliniutillu taakku nukissanut atorneqarsinnaasunut aqutissiuussinissaat neriuutigineqarpoq.

Aammattaaq sanaartukkanut maleruagassat Kalaallit Nunaanni illuliornermi oqorsaatinut atorneqartunut sukanganerusumik maleruagassiissut atuutilersinneqarsimapput.

Kalaallit Nunaanni aktiaatileqatigiiffiit annerit, assersuutigalugu Royal Arctic Line A/S-imi aammalu Air Greenland-imi pissutsit pillugit atorfillatigoortumik nukissamik ileqqaaruteqarnissaq kiisalu nukissamik atorluaanerunissaq pillugu ataatsimiinnerit ingerlanneqartarput. Suliffeqarfissuit taakku CO₂-mik aniatitaasa annikillisinneqarsinnaaneranut periarfissaasa oqaloqatigiissutigineqarnissaat siunertaavoq. Suliffeqarfissuarni taakkunani uuliamik atuinerup annikillisarneqarnissaa eqqummaariffigineqarpoq, uuliamummi aningaasartuutit naatsorsuutitut annertuumik sunniuteqarmata. Timmisartut Dash 8-t Air Greenland-imi atorneqalersut, orsussamik atuinerup annikillisisippot, Royal Arctic Line—lu atlantikoq ikaarlugu angalasarnerminni uuliamik ileqqaaruteqarnissaq anguniarlugu sukkassutsimik appaanissaq sulissutigineqarluni. Tamannalu suliffeqarfissuup aningaasaqarneranut silaannatsinnullu iluaqutaavoq.

Massakkut inunnik suliffeqarfinnilluunniit nukissamik atuilluarnerunissamik il.il. siunnersuisinnaasumik nukissiornermut tunngasunik siunnersorteqalernissamik pilersitsinissaq sulissutigineqartunut ilaavoq.

3. Namminersorlutik Oqartussat kiisalu kommunit suliffeqarfiini tamani nukissiuutit ataavartut atorluarneqarnerunissaat siunertaralugu atortorissaarusersuinissaq pillugu Naalakkersuisut immikkut aningaasaliissutissanik pilersitsinissaminut anguniagaqalersaarpat?

Namminersorlutik ingerlatsisut, pisortanit namminersortunillu pigineqartut inuiaqatigiinni sullissinernik pingaarutilinnik arlalinnik ingerlatsippot, taakkulu taamaalillutik gassinik silaannarmik kissakkiartortitsisartunik aniatitsinitsinnut peqataaqataapput. Taamaammallu aamma taakku nukissiamik atuinerup pitsanngorsaavissatut nukissanillu ataavartunik atuilernissaannut piukkunnaateqarlutik.

Naalakkersuisulli tassunga tunngasunut aningaasaliinissamik eqqarsaatersuuteqanngillat. Tamanna suliffeqarfiit nukissamat imminut akilersinnaasumut aammalu kiassarnermut il.il. aningaasartuutimik appartinnissaannut aningaasaliinissamik namminneq soqutigisaqartussaanerannik patsiseqarpoq. Taamaammallu tamanna suliffeqarfiit aallaavittut namminneerlutik aningaasalersorlugulu ingerlattariaqarpat.

Tamatumalu saniatigut tapiissuteqarsinnaanermik aaqqissuussinerup allaaserineqartup taamaallaat suliffeqarfinnut pisortanit kommuninillu pigineqartunut atortinneqarnissaanik siunertaqartup, taamaalillunilu suliffeqarfinnik namminersortunit pigineqartunik mattussisup naapertuuttuunera apeqquuserneqarsinnaavoq.

Tamatuma saniatigut ullumikkut aningaasanut inatsimmi konto 73.95.04 Nukissiuutini ataavartuni ilisimatusarnermi ineriartortitsinermilu suliniutit pillugit aningaasaliissutit aqutugalugit suliffeqarfinnut nukissamik ileqqaaruteqarnissamik ineriartortitsinermik ingerlatsinissamut suliniuteqarumasunut tapiisoqarsinnaanera periarfissaareerpoq.

Siunnersuutitut tamanut nukissiamik ataavartumik atuinermik siuarsaasinnaasunut soqutiginninnera naggasiullugu oqaatigissavara. Suliniutaasinnaasut suulluunniit ammasumik oqaluuserisinnaanerat pingaartuuvoq, taamaammallu gassinut silaannarmik kissakkiartortitsisartunut annikillisaanermut tunngatillugu oqallinnermut ilanngussannut qutsavigissavakkit.

Inussiarnersumik inuulluaqqusillunga
Med venlig hilsen

Jens B. Frederiksen